



Sumáriu Kazu
Tribunál Distritál Dili
Abril 2022

Afirmasaun: Sumáriu Kazu tuirmai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Dili

1. Totál kazu ne'ebé JSMP monitoriza: 15

Artigu sira	Tipu kazu	Númeru
Artigu 145 Kódigu Penál (KP)& artigu 2, 3 no 35(b) Lei Kontra Violénsia Doméstika(LKVD).	Ofensa ba integridade fízika simples ho natureza violénsia doméstika no tipu ilízitu sira kona-ba violénsia doméstika nian.	4
Artigu 145 KP konjuga ho artigu 2, 3, 35(b) LKVD, Artigu 183 & artigu 174 KP	Ofensa ba integridade fízika simples ho natureza violénsia doméstika no tipu ilízitu sira kona-ba violénsia doméstika nian, devasa no explorasaun seksuál ba ema seluk	
Artigu 142 Kódigu Penál	Infantisídiu	
Artigu 172 Kódigu Penál	Violasaun seksuál	
Artigu 177 Kódigu penál	Abuzu seksuál ba menór	
Artigu 257 Kódigu penál	Abuzu konfiansa agravadu	1
Artigu 267 KP	Burla agravada	1
Total		6

2. Totál desizaun ne'ebé JSMP monitoriza: 13

Tipu desizaun	Númeru
Pena multa (Artigu 67 KP) no Suspensaun ba prizaun nia ezekusaun (Artigu 68 KP) no absolve	1
Pena multa (Artigu 67 KP)	1
Suspensaun ba prizaun nia ezekusaun (Artigu 68 KP)	
Total	2

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 2

B. Deskrisaun sumáriu ba desizaun kazu sira ne'ebé JSMP monitoriza:

1. Krime Ofensa Integridade Fisika Simples

Nú. Prosesu : 0042/21.ERSIC
KompozisaunTribunál : Singular
Juis : Dra. Ana Paula
Prokuradór : Dr. Simão Seixas
Defeza : Dr. Manuel Exposto
Desizaun : Pena multa

Iha 04 Abril 2022, Tribunál Distritál Dili preside julgamentu leitura sentensa ba krime ofensa integridade fisika simples natureza violénsia doméstika ne'ebé envolve arguidu RM hasoru nia feen JS iha Aldeia Lara, Suku Ponilala, Postu Administrativu Ermera, Munisípiu Ermera.

Akuzasaun

Prokuradór akuza katak iha 7 Juñu 2021 iha oras tuku 9:00 dadeer arguidu tuku lezada iha ren-toos halo lezada monu tun ba rai, arguidu kontinua tuku tan dala rua iha kaba'as parte karuk no parte loos, bainhira lezada hader arguidu lori fatuk tuda tan dala ida iha lezada nia kotuk laran. Antes ne'e arguidu ho lezada diskute malu kona-ba lezada nia kuñada (arguidu nia feton) foti *metxin* iha sira nia dapur, lezada haree no hasee nia kuñada dehan '*bainhira atu foti sasan ruma iha ne'e tenke fó hatene hau*' tanba antes ne'e lezada nia kuñada ne'e mós foti lezada nia roupa sein fó hatene lezada. Lezada mós dehan ba arguidu atu fó hatene ba nia feton, bainhira mai uma atu foti sasan ruma tenke husu it alai, la'os foti nonok deit. Nune' arguidu mós hatan lezada dehan *nusá ó bandu hau nia feton la mai iha uma ne'e ka'*, arguidu nerbosu sira diskute malu no arguidu halo agresaun hasoru lezada.

Konsekuénsia husi arguidu nia hahalok ne'e lezada senti moras iha nia isin lolon no hetan kanek fitar iha kotuk laran.

Prokuradór akuza arguidu kontra artigu 145 KP kona-ba ofensas integridade fisika simples ho natureza violénsia doméstika no artigu 2 nú.1,2 (a) artigu 3 (a), artigu 35 (b) husi LKVD.

Produsaun ba prova sira

Iha prosesu julgamentu, arguidu konfensa parsialmente ba aktu sira ne'ebé nia komete hasoru lezada no arguidu mós arrepende ninia hahalok sira.

Entretantu, lezada kontinua konfirma ba akuzasaun sira .

Alegasaun finál

Prokuradór haktuir katak arguidu konfesa parsialmente no arguidu arrepende ninia hahalok tanba ne'e husu ba tribunál atu kondena arguidu ho pena prizaun fulan tolu no suspende ba tinan ida.

Entretantu defeza haktuir katak arguidu konfesa faktu no arrepende ninia hahalok no fo sala tais no osan ho montante US\$50.00. Tanba ne'e, husu ba tribunál atu fó pena ne'ebé adekuadu ba arguidu.

Desizaun

Depois avalia faktu hotu, tribunál prova arguidu komete duni krime hasoru lezada, arguidu tuku lezada iha ren-toos halo lezada monu tun ba rai, arguidu kontinua tuku tan dala rua iha kaba'as parte karuk no parte loos, bainhira lezada hader arguidu lori fatuk tuda tan dala ida iha lezada nia kotuk laran.

Bazeia ba faktu provadu sira ne'e tribunal konklui prosesu ne'e no kondena arguidu ho pena multa US\$50.00. kada loron sei selu 0.50 sentavos durante loron atus ida no bainhira arguidu la kumpri desizaun refere arguidu sei hetan pena prizaun durante loron neen nulu resin neen.

2. Krime armas brankas

Nú. prosesu : 0136/20 DICMR
Kompozisaun tribunál : Koletivu
Juis : Dra. Ana Paula Fonseca, Dra. Maria Solana no
Dra. Julmira Auxiliadora Barros da Silva.
Prokuradór : Dr. Osorio de Deus
Defeza : Dra. Adelina Moek (advogada Privada)
Desizaun : Pena prizaun tinan 3 suspende ba tinan 3 fulan 6

Iha 04 Abril 2022 Tribunál Distritál Dili prezide julgamentu leitura sentesa ba krime armas brankas ne'ebé envolve arguidu Adifo Tabesi Sousa hasoru Lezadu Daniel de Araujo Mendonça hanesan viziñu, iha Munisípiu Dili.

Akuzasaun Prokuradór

Prokuradór akuza katak iha 16 Marsu 2020, iha tuku 19:00 kalan lezadu tula modo ho matorizada husi Taibesi ba iha Ailok Laran. To'o iha aldeia Buka Fini, lezadu haree arguidu hamri'ik hela iha estrada klaran tanba ne'e mak lezadu mós halai neneik, bainhira lezadu besik bá, arguido tuku kedas lezadu iha lezadu nia hirus matan no lezadu tun husi motorizada no sira nain rua tuku malu, lezadu tuku dala ida iha arguidu nia ren-toos. Arguidu halai hosi fatin akontesimentu ba nia uma hodi foti samurai rua, hafoin arguidu fila fali ba fatin akontesimentu tanba lezadu ta'uk lezadu halai husik hela nia motorizada iha fatin akontesimentu no halai ba uma hodi fó hatene ba nia Tiun. Liu tiha minutu 20 arguidu ka'er samurai rua ne'e hodi tuir lezadu ba to'o iha lezadu nia uma, maibé tanba momentu ne'ebá ema barak mak tuur hela iha ne'ebá, arguidu mós fila de'it.

Bainhira arguidu fila, membru KPK kaer kedas arguidu iha dalan no halo kontaktu ba polisia hodi tula arguidu ba hatan iha eskuadra Komoro. Iha kalan lezadu ho nia tiun ba kedas arguidu nia uma hodi rezolve problema ne'e maibé la konsege resolve. Durante

ne'e lezadu ho arguidu laiha problema tanba sira viziñu no depoisde akontesementu lezadu ho arguidu di'ak malu fali.

Prokuradór akuza arguidu kontra artigu 2 nú 2(e, 20 nú 1 lei nú 5/2017 lei armas brankas,

Produsaun ba prova sira

Iha julgamentu arguidu konfesa integralmente ba faktu hotu iha akuzasaun no haktuir katak faktu sira iha akuzasaun ne'e loos hotu, iha momentu akontesimentu arguidu ho kondisaun lanu tanba hemu tua sabu aqua boot ida no foti samurai atu salva-an. Arguidu dekalra mós katak depoisde akontesementu di'ak malu fali ho lezadu no ka'otalia malu hanesan bain-bain nomos depoisde akontesementu arguidu kumpri prizaun preventiva durante fulan ida ho balun, arguidu arrepende ninia hahalok no sei la repete tan nia aktu iha fauturu.

Bazeia ba arguidu konfesaun integralmente ba faktu sira hotu iha akuzasaun nune'e tribunál decide hodi presinde lezadu no testemuña.

Alegasaun final

Prokuradór haktuir katak arguidu konfesa faktu sira hotu, kona-ba objeitu krime ne'ebé arguidu lori to'o lezadu nia uma no atu fila ba nia uma mak membru KPK lori ba polisia. lei armas brankas proibe uza arma sira ne'ebé define hanesan samurai, tudik, katana, tudik ne'ebé la inklui uza ba nesesidade uma laran ka ba halo to'os. Importante halo prevensaun tanba krime ne'e halo sosiedade pániku. Prokuradór husu atu arguido labele prátika tan kualker krime iha future, nune'ehusu ba tribunál atu kondena arguidu ho pena prizaun tinan rua no suspende ba tinan tolu.

Entretantu parte defeza husu ba tribunál atu aplika pena ne'ebé mais adekuadu tuir arguidu nia kondisaun no prova ne'ebé mak iha tanba arguidu konfesa no arguidu kumpre prizaun preventiva durante fulan ida ho balun no depoisde akontesementu sira diak malu fali no haree malu hanesan bain-bain, arguidu kolabora ho tribunál, arrepende nia hahalok no promete sei la repete tan nia aktu hanesan iha futuro.

Desizaun

Depoisde avalia faktu hotu, tribunál prova arguidu tuku lezadu kona iha lezadu nia hirus matan maibé la konsege monu no arguidu kontinua lori ninia samurai 2 duni lezadu maibé la konsege toman.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu arrepende ninia hahalok no promete sei la repete ninia hahalok ne'e iha futuro hasoru lezadu ka ema seluk, nune'e tribunál konklui prosesu ne'e no kondena arguidu ho pena prizaun tinan tolu no suspende ba tinan tolu fulan neen.

3. Krimi ofensa integridade fisika simples

Nú. prosesu : 0474/21DICMR
Kompozisaun tribunál : Singular

Juíz : Dra. Maria Solana
MP : Dr. Luis Hernani Rangel da Cruz
Defeza : Dr. Henrique Marris
Desizaun : Pena Multa

Iha 5 Abril 2022, Tribunál Distritál Díli prezide julgamentu leitura sentensa ba krime ofensa integridade fisika simples ne'ebé envolve arguidu Vascolau Meta hasoru lezada Jenita Pinto nudar arguidu nia fen, iha Munisípiu Dili.

Akuzasaun prokuradór

Prokurador akuza katak iha 01 Setembru 2021 iha oras tuku 15:00 lokraik iha Komoro Dili momentu ne'ebá arguidu lori liman loos basa dala rua iha lezada nia hasan parte karuk no loos rezulta moras. Arguidu sempre halo agresaun ba lezada maibé lezada nunka hato'o keixa ba polisia.

Prokuradór akuza arguidu ho artigu 145 KP kona-ba ofensa integridade fíísika simples konjuga ho artigu 2,3 lei no 7/2010 kona-ba krime violénsia doméstika.

Produsaun ba prova sira

Iha prosesu julgamentu arguidu deklarara parsiálmente katak faktu balun loos no balun laloos, faktu laloos maka arguidu basa dala ida deit la'os dala rua, arguidu mos deklarara katak depoisde akontesementu sira di'ak malu kedas no rezolve ona, arrepende ninia hahalok no promete sei la komete tan krime hanesan iha futuro.

Entertantu lezada konfirma faktu sira hotu iha akuzasaun no konfirma arguidu nia deklarara kona-ba la halo ona krime hanesan hasoru lezada no arguidu halo agresaun ida ne'e tanba lezada nia provokasaun.

Alegasaun finál

Ministériu públiku haktuir katak arguidu konfesa ba faktu sira hotu, arguidu arrepende ninia hahalok no sira di'ak malu ona nune'e ministériu públiku husu ba tribunál atu fó pena multa ba arguidu

Enkuandu defeza haktuir katak arguidu halo agresaun hasoru lezada tanba iha provokasaun husi lezada, arguidu mos arrepende ba ninia hahalok no promete ba tribunál atu la halo tan hahalok hanesan iha futuro nune'e husu ba tribunál atu aplika pena admoestrasaun ba arguidu.

Desizaun

Depoisde avalia faktu sira hotu, tribunál prova katak arguidu basa dala rua iha lezada nia hasan parte karuk no parte loos rezulta moras.

Bazeia ba faktu provadu sira ne'e hotu no tetu mós sirkunstánsia hotu-hotu ne'ebé asociadu ho krime ne'e, tribunál konklui prosesu ne'e no kondena arguidu ho pena multa USD\$75.00, ne'ebé arguidu sei selu US\$1.00 kada loron durante loron 75.

Bainhira arguidu la selu pena multa ne'e, arguidu sei kumpri iha prizaun durante loron 50 nu'udar pena alternativa.

4. Krime tentativa violasaun seksuál

Nú prosesu : 0045/20.DIDIL
Kompozisaun Juis : Koletivu
Juis : Dra. Ana Paula, Dr. Maria Solana, Dr. João Ribeiro
Prokuradór : Dr. Claudino do Rosario
Defesa : Dr. Fernando de Carvalho
Desizaun : Absolve

Iha 7 Abril 2022, Tribunál Distritál Dili prezide julgamentu leitura sentensa ba krime tentative violasaun seksuál ne'ebé envolve arguidu B F hasoru ELda C O, iha Munisípiu Dili.

Akuzasaun Prokurador

Prokuradór akuza katak iha 19 Feveireiru 2020 iha oras tuku 14:58 iha Eskola 04 Setembru Unamet, Munisípiu Dili. Iha tempu ne'eba lezada ho ninia kolega feto ida hein hela mikrolete iha estrada ninin eskola nia oin, derepente arguidu ho motor *revo* ida ba para iha lezada nia oin no dehan ba lezada katak '*nusá la ba ona uma*', lezada mós hatan katak *atu ba maibé kareta maka araska* nune'e arguidu dehan ba lezada *entaun hau lori ó fila ba uma*, maibé lezada lakohi.

Bainhira mikrolete ba para iha sira nia oin lezada nia kolega ba sae tiha mikrolete maibé lezada la bele sae kareta tanba arguidu kaer metin lezada nia liman no taka netik dalan nune'e lezada la konsegue sae kareta. Rai mós nakukun ona arguidu mós kaer lezada nia liman metin parte loos no rasta lezada ba iha eskola nia kotuk. Iha momentu n'e'eba lezada husu ajuda ba nia kolega ida naran Este maibé la ajuda tanba tauk arguidu.

Arguidu hatete ba lezada katak "ita rua ba hau nia uma lai tanba hau nia ama, apa ba hotu lospalos maibé lezada lakohi ba nune'e arguidu kaer lezada nia liman karuk hodi dada sae ba eskada andar leten durante iha andar leten arguidu koalia ba lezada atu halo relasaun seksuál maibé lezada lakohi nafatin, nune'e arguidu hatete ba lezada katak"antes '*ó atu fila hau rei tiha ó lai*'.

Arguidu nafatin fó hatene ba lezada atu ba iha arguidu nia uma maibé lezada lakohi nune'e arguidu basa dala ida iha lezada nia kanuruk halo lezada dada iss la di'ak, basa dala ida iha lezada nia hasan parte loss halo lezada tanis maibé arguidu la preokupa. Arguidu kontinua obriga lezada ba iha nia uma maibé lezada kontinua lakohi nune'e arguidu dudu rabat lezada ba iha parede, lezada koko atu hakilar maibé forsa laiha nune'e lezada tanis de'it. Iha momentu ne'ebá labarik sira ba hafuhu lezada no arguidu nune'e lezada ho tanis mak husu ajuda ba labarik sira hodi labarik sira ba halo keixa iha siguransa eskola nian no komunika kedas ba polisia hodi ba kaer arguidu no kontinua lori kedas sira ba eskuadra polisia.

Arguidu nia hahalok ne'e halo lezada tauk, trauma no la livre atu ba eskola tanba arguidu hela besik iha eskola.

Prokurador akuza arguidu ho artigu 172 KP kona-ba tentativa violasaun seksuál.

Produsaun ba provas sira

Iha prosesu julgamentu, arguidu deklara parsialmente katak faktu balu loos no balu laloos, faktu loos mak arguidu antes ne'e iha relasaun namora ho lezada liu husi *Facebook*, arguidu mós deklara katak sira hasoru malu iha eskola tanba sira halo kontaktu malu antes ona liu husi *Facebook*. Arguidu nega katak nia la rasta lezada no la baku lezada maibé hakarak deit atu lori lezada ba iha arguidu nia uma ho intensaun hodi foti motor no tula lezada fila ba nia uma. Arguidu mós deklara katak sira ba iha iskola nia andar leten tanba rai udan no sira tur deit iha eskada no arguidu la book ka halo buat ruma hasoru lezada.

Entertantu lezada kontinua konfirma ho akuzasaun.

Alegasaun Final

Prokuradór haktuir katak arguidu provadu komete krime tentative violasaun seksuál entada hasoru lezada, nune'e husu ba tribunál atu kondena arguidu tuir konviksaun tribunál nian.

Defeza haktuir katak kazu ne'e la priense rekejitus husi artigu 172 KP, mezmu moralmente arguidu sala, maibé iha akontesimentu ne'e arguidu la obriga no ameasa lezada. Nune'e husu ba tribunál atu absolve arguidu.

Desizaun

Depoisde avalia faktu hotu, tribunál konsidera laiha elementu obligasaun, violénsia no ameasa, nune'e tribunál konklui prosesu ne'e no absolve arguidu husi krime ne'e.

5. Krime ofensa integridade física simples ho natureza violénsia doméstika

Nú prosesu	: 0089/21.DIDIL
Kompozisaun tribunál	: Singulár
Juíz	: Dra. Maria Solana
MP	: Dr. Napoleão Soares
Defeza	: Dr. Fernando de Carvalho
Desizaun	: Omologa pedidu dezisténsia keixa no pena prizaun

tinan 3 supende ba tinan ida fulan 6

Iha 11 Abril 2022, Tribunál Distritál Díli prezide julgamentu leitura sentensa ba krime ofensa integridade física simples ne'ebé envolve arguidu RdoC hasoru nia feen B M dos Santos, iha Munisípiu Dili.

Akuzasaun prokuradór

Prokuradór akuza katak iha 23 Maiu 2021 iha oras tuku 20:45 kalan iha aledeia 05 Caicoli, arguidu tuku makas dala ida iha lezada nia ulun, tuku dala ida iha lezada nia kabas no tebe makas dala ida iha lezada nia kelen no lori liman basa dala ida iha

lezada nia hasan sorin karuk. Arguidu mós ameasa lezada dehan *'kuandu ó tutuir bebeik hau, hau sei oho mate ó.*

Arguidu ninia hahalok ne'e rezulta lezada hetan moras makas, bubu no mean ihaulun, moras, bubu no metan iha kabas no moras iha kelen durante loron tolu lezada la'ó ba mai ladiak no moras iha lezada nia hasan.

Prokuradór akuza arguidu ho artigu 145 KP konjugal ho artigu 2, 3 alinea (a), artigu 35 alinea (b) husi LKVD no artigu 157 KP kona-ba ameasa.

Antes tama ba produsaun ba prova sira, kona-ba krime amesa, perante tribunál lezada decide desiste nia keixa hasoru arguidu no arguidu mós konkorda ho desizaun lezada nian nune'e antes tama ba iha deklarasaun arguidu nian tribunál decide hodi omologa tiha krime ameasa.

Produsaun ba prova sira

Iha prosesu julgamentu arguidu hili direitu ko'alia hodi deklarar ba tribunál katak arguidu basa dala ida de'it iha lezada nia hasan maibé la'ós tebe no tuku Antes ne'e lezada husu osan ba arguidu, maibé arguidu osan laiha tanba arguidu foin uza osan ba nia maun mate iha Bobonaro no iha momentu hanesan lezada mós haruka nia oan halai tuir arguidu ba iha Estrada publiku nune'e halo arguidu paniku no provoka arguidu nerbosu no arguidu basa dala ida iha lezada nia hasan.

Enkuantu lezada kontinua konfirma faktu sira hotu iha akuzasaun, lezada ka'er toman arguidu ho fetu seluk iha sira nia uma nune'e lezada decide hases-an husi arguidu. Lezada mós konfirma lezada husu osan ba arguidu atu hola labarik sira nia susuben maibé arguidu dehan osan laiha nune'e lezada mós decide hodi haruka labarik hodi ba hela hamutuk ho arguidu tanba lezada laiha forsa atu sustenta nia oan sira.

Testemuña Isaura Marçal de poitmenta katak testemuña hakfodak bainhira rona arguidu ho lezada diskuti malu no halo testemuña hader no tuir lezada sira bainhira too iha estrada publiku área kaikoli testemuña haree arguidu basa dala ida iha lezada nia hasan, tuku dala ida iha lezada nia kanuruk no tebe dala ida iha lezada nia kelen halo lezada monu tuun ba iha baleta.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada no sasin nune'e husu ba tribunál atu kondena arguidu ho pena prizaun tinan 3 suspende ba tinan 1 fulan 6.

Entretantu defeza haktuir katak iha lezada ninia deklarasaun hateten katak arguidu tuku duni maibé la makas no iha mós diferensia deklarasaun husi lezada ho testemuña katak tuku iha tilun huun no defeza konsidera aktu sira ne'e la grave nune'e husu ba tribunál atu aplika pena ne'ebé kaman ba arguidu.

Desizaun

Bazeia ba akordu dame husi parte rua no pedidu dezisténsia husi lezada nune'e tribunál konklui prosesu ne'e no omologa akordu dame refere. Koana-ba krime ofensa integridade fizika simples tribunál kondena arguidu ho pena prizaun tinan 3 suspende ba tinan 1 fulan 6.

6. Krime ofensa intrigridade fizika simples ho natureza violénsia doméstika

Nú. Prosesu : 0076//21/LIBZT-Sing
KompozisaunTribunál : Singulár
Juis : Dra. Maria Solana Fernandes
Prokuradór : Dr. Luis Hernani Rangel da Cruz
Defeza : Dr. Manuel Sarmentu
Dezisaun : Pena multa US\$45

Iha 12 Abril 2022, tribunál distritál Dili prezide julgamentu leitura sentensa ba krime violénsia doméstika ne'ebé envolve arguidu B B hasoru nia feen A A iha aldeia Piço de Baixo Suku Lauhata, Munisípiu Likisa.

Akuzasaun

Prokurado akuza katak iha 14 Agostu 2021, iha oras tuku 13:00 lokraik, basa dala rua iha lezada nia hasan parte karuk. Antes ne'e arguidu fila mai uma haree hahan atu han maibé lezada la prepara hahan meiudia, arguidu ho lezada diskute malu, arguidu nerbosu no halo agresaun hasoru lezada..

Prokuradór akuza arguidu kontra artigu 145 KP kona-ba ofensa integridade fizika simples konjuga ho artigu 2, (c) 3 (b), 35 (b) LKVD.

Produsaun ba prova sira

Iha prosesu julgamentu, arguidu deklara katak faktu sira iha akuzasaun ne'e loos hotu, arguidu konfessa no arrepende ninia hahalok sira.

Entretantu, Lezada kontinua konfirma ho akuzasaun sira antes.

Alegasaun final

Prokuradór konsidera katak problema ne'e mosu tanba parte rua, argudu ho lezada diskute malu relasiona ho ekonomia uma laran, tanba ne'e husu ba tribunál atu kondena arguidu ho pena multa US\$60 durante loraun 60 kada loraun sei selu US\$1,00.

Entertantu defesa husu ba tribunál atu fó pena ne'ebé kaman ba arguidu ho konsiderasaun sira arguidu konfensa no arrepende ninia hahlok.

Desizaun

Depois de avalia faktu sira hotu tribunál konklui prosesu ne'e no kondena arguidu ho pena multa US\$45.00 kada loraun sei selu US\$1.00 durante loraun 45.

7. Krime ofensa integridade fizika simples ho natureja violénsia doméstika

Núprosesu : 0595/21.DICMR

Kompozisaun tribunal	: Singulár
Juis	: Dra. Argentino Neves
Prokuradór	: Dr. Napoleão Soares da Silva
Defeza	: Dr. Estaque Guterres
Desizaun	: Pena admoestasaun

Iha 21 Abril 2022, Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violénsia doméstika, ne'ebé envolve arguidu DP hasoru nia oan DG, iha munisípiu Dili.

Akuzasaun prokuradór

Prokuradór akuza katak iha 19 Novembru 2021 iha oras tuku 11:30 meudia iha arguidu sira nia uma, arguidu lori fiu eletrisidade nian baku dala ida iha lezada nia kelen, baku dala rua iha lezada nia liman no baku tan dala ida iha lezada nia kanotak hafoin lori tizora tesi badak tiha lezada nia fuk.

Arguidu nia hahalok ne'e rezulta lezada hetan moras makas, bubu metan no kanek iha lezada nia kelen sorin parte karuk, moras makas no bubu metan iha liman, moras makas, bubu no kanek iha kanotak no lezada mós sente triste. Lezada halo tratamento iha PRADET.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (c) 3 (b), 35 (b) LKVD.

Produsaun ba prova sira

Iha julgamentu arguida konfesa faktu hotu iha akuzasaun no deklarata katak depoizde akontesimentu liu tiha semana rua sira di'ak malu no resolve tuir dalan kultura nian. Arguidu fó sala ho tais ida, lipa ida no osan hamutuk US\$50, husu deskulpa ba lezada, arrepende ninia hahalok nonopromete sei la halo tan hahalok hanesan hasoru lezada iha futuru.

Enkuantu lezada konfirma faktu sira iha akuzasaun, diak malu ona no depoizde akontesimentu arguidu la halo ona krime hasoru lezada.

Alegasaun final

Prokuradór konsidera arguida provadu komete krime arguidu rasik deklarata no konfirma mós hosi lezada, mesmu arguidu nu'udar lezada nia aman no di'ak malu ona, arguidu fó sala ba lezada tuir kultura Timor-nian, arguidu mós arrepende ninia hahalok. Maibé Prokuradór nafatin husu ba tribunál atu fó pena prizaun fulan 3 suspende ba tinan 1 fulan 6 ho razaun katak prokuradór konsidera pena multa la bele aplika ba arguidu tanba arguidu nia rendimentu kada fulan ne'ebé la serteza, nune'e mós la bele aplika pena admoestasaun ho razaun tanba kazu sira hanesan ne'e kontinua aas ba bebeik.

Entretantu defeza haktuir katak, arguida foin primeiravéz mai hatan iha tribunál, arrepende ninia hahalok, promete sei la repete nia hahalok hanesan iha futuru, sira hela

hamutuk no too agora arguidu mak sei kontinua sustenta lezada, tanba ne'e husu ba tribunál fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu lori fiu eletrisidade nian baku dala ida iha lezada nia kelen, baku dala rua iha lezada nia liman no baku tan dala ida iha lezada nia kanotak. Arguidu mós lori tizora tesi badak lezada nia fuk.

Bazeia ba prova sira ne'e no tetu mós sirkunstánsia atenuante sira hanesan arguidu foin primeiravés halo agresaun hasoru lezada, depoisde akontesimentu arguidu la komete tan krime seluk, arrepende ninia hahalok no rezolve ona tuir kultura Timor nian, nune'e tribunál konklui prosesu ne'e no kondena arguidu ho pena admoestasaun.

8. Krime ofensa integridade fisika simples

Nú. Prosesu : 0001/21.DIMTN
KompozisaunTribunál : Singular
Juis : Dr.Argentino Luisa Nunes
Prokuradór : Dr. Hipolito Exposto Martins Santana
Defeza : Dr. Fernando Lopes de Carvalho
Dezisaun : Omologa

Iha 21 Abril 2022, Tribunál Distritál Dili prezide julgamentu leitura sentensa ba krime ofensa integridade fisika simples ne'ebé envolve arguidu José Toninho Lopes hasoru lezada Madalena, iha Munisípiu Dili.

Akuzasaun

Prokurador akuza katak iha 04 Janeiro 2021, maizumenus iha oras tuku 17:00 lokraik,iha momentu ne'eba lezada Madalena, ne'ebe nu'udara rguidu nia inan foin fila husi to'os to'o uma fui be'e atu hemu nune'e arguidu tama tuir lezada ba uma laran lori liman buti lezada nia inus no liman fai ba lezada nia matan hodi koalia ho lian makas hodi duni lezada sai husi uma se karik la sai arguidu ameasa atu oho lezada.

Tanba lezada tauk lezada halai sai husi uma atu ba nia oan mane boot, maibé arguidu duni tuir no kaer lezada nia liman karuk, rasta lezada monu ba rai, lori ain tur hanehan metin lezada iha rai no kontinua lori ain tur hanehan iha lezada nia kabun, Nune'e lezada senti moras no hakilar, maibé arguidu nafatin kontinua asaun ne'e, arguidu kaer lezada nia fuk hodi rasta mai uma. Arguidu sempre baku lezada maibé lezada la halo keixa, Depois akontesementu ne'e mak lezada foin primeiravés halo keixa tanba tauk ho asaun arguidu nian.

Prokuradór akuza arguidu kontra artigu 145 KP kona-ba ofensa integridade fizika simples ho nia moldura penal to'o tinan 3 ka multa.

Produsaun ba prova sira

Bazeia ba artigu 262 hosi KPP, kona-ba tentativa ba konsiliaun, nune'e antes tama ba produsaun ba prova, juis husu atu halo tentativa konsiliaun ba arguidu ho lezada

Iha prosesu konsiliaun ne'e, lezada hakarak deziste nia keixa hasoru arguidu, ho kondisaun arguidu la repete tan ninia hahalok hanesan iha future, arrepende nia hahalok no lori kedas lezada ba halo tratamentu iha postu saude ne'ebé besik iha sira hela fatin.

Alegasaun finál

Prokurador husu ba tribunál atu deziste tiha keixa ne'e tanba arguidu arepende duni ninia hahalok ne'e no promote sei la repete tan nia hahalok hanesan iha futuro ho nune'e prokurador husu ba tribunál atu omologa kazu refere.

Entertantu defeza konsidera akuzasaun refere tama iha natureza krimese mi públiku no arguidu la marka prezensa, nune'e husu ba tribunál atu deziste tiha keixa tanba arguidu ho lezada konkorda hakarak taka kazu ne'e.

Desizaun

Bazeia ba akordu husi parte rua no pedidu dezitensia keixa husi lezada nune'e tribunál konklui prosesu ne'e no omologaprokesu refere.

9. Krime ofensa integridade fizika simples ho natureza violensia doméstika

Nú. Prosesu : 0042/21. ERERM
Kompozisaun Tribunál : Singular
Juis : Dra. Ercilia de Jesus
Prokurador : Dr. Simão Seixas
Defeza : Dra. Lara de Jesus
Desizaun : Pena Prizaun Fulan 3 Suspende ba Tinan 1

Iha 22 Abril 2022, tribunál distritál Dili prezide julgamentu leitura sentensa ba krime ofensa ba integridade física simples ho natureza violensia doméstika ne'ebé envolve arguidu Jd R hasoru lezada FM, iha aldeia Asulau Suku Fatubessi, Postu Administrativu Hatulia, Munisípiu Ermera.

Akuzasaun

Iha 05 Agostu 2021, iha oras tuku 15:23 Loraik iha arguidu no lezada sira nia uma, arguidu uza kadeira ai-baku dala ida iha lezada nia kanuruk , dala ida iha reen –toos no dala ida iha tilun-hun no arguidu foti tan mina manas fakar ba lezada nia isin loloon halo lezada nia isin loloo kanek. Arguidu nia hahalok ne'e rezulta lezada nia isin lolon kanek no sente moras. Antes ne'e arguidu ho lezada diskute malu kona-ba sira nia fahi ne'ebé lakon, arguidu hirus no halo agresaun hasoru lezada.

Prokurador akuza arguidu kontra artigu 145 KP kona-ba krime ofensa ba integridade fizika simples ho artigu 2, 3, 35 no 36 husi Lei Kontra Violensia Domestika.

Produsaun ba prova sira

Iha prosesu julgamentu, arguidu deklara parsialmente, faktu ne'ebé iha balun loos no balun laloos, arguidu rejetei kataknia la fakar mina ba lezada nia isin-loloon.

Entretantu, lezada nafatin konfirma ba faktu sira iha akuzasaun katak arguidu la'os fakar mina direta ba lezada nia isin loloon maibé arguidu tebe tasu, ne'ebé iha momentu ne'e sona hela hudi mak fekit kona lezada nia oin rezulta mean no kanek.

Alegasaun finál

Prokuradór konsidera faktu sira iha akuzasaun provadu hotu mezmu arguidu nega kona-ba mina ne'ebé fekit ba lezada nia oin maibé lezada kontinua konfirma ba faktu sira iha akuzasaun. Tanba ne'e, husu ba tribunál atu kondena arguidu ho pena prizaun fulan tolu no suspende ba tinan ida.

Entretantu defeza haktuir katak arguidu konfessa ba faktu sira, no arrepende ba ninia hahalok, arguidu ho lezada di'ak malu ona no nafatin moris hamutuk hanesan feen ho laen. Tanba ne'e defeza husu fo'o pena ne'ebe kma'an ba arguidu.

Desizaun

Depois avalia faktu hotu, Tribunal konsidera faktu ikona-ba fakar mina ba lezada nia oin la provadu tanba tribunál duvida ho lezada nia deklarasaun kona-ba kanek-fitar iha lezada nia oin ne'ebé bainhira mai tribunál kanek-fitar ne'e laiha ona. Nune'e tribunál diside kondena arguidu ho pena prizaun fulan tolu suspende ba tinan ida.

10. Krime ofensa ba integridade fízika simples ho natureza violénsia doméstika

Nú. Prosesu : 0117/21/DINFT
Kompozisaun Tribunál : Singular
Juis : Dra. Maria Solana Fernandes
Prokuradór : Dr. Renato Bere Nahac
Defeza : Dr. Juvinal Yanes Freitas
Dezisaun : Pena Multa

Iha 26 Abril 2022, Tribunál Distritál Dili prezide julgamentu leitura sentensa ba krime ofensa ba integridade fízika simples ho violénsia doméstika ne'ebé envolve arguidu S R G hasoru lezada PVFdS, iha Aldeia Baba Liura, Suku Bemori, Postu Administrativu Nain-feto, Munisípiu Dili.

Akuzasaun

Prokuradór Akuza katak iha 14 Agostu tinan 2021 maisumenus iha oras tuku 20.00 kalan fatin Bemori ,Dili lezada hamutuk ho nia prima sira ba tuir festa. Arguidu husu lezada hodi sira nain rua dansa dala rua no depois lezada kontinua dansa fali ho ema seluk. Iha oras tuku 2:00 madrugada, arguidu bolu fali lezada atu dansa, maibé nia la rona tanba ne'e arguidu tama ba tenda laran hodi rasta sai lezada ba iha liur tuku dala tolu iha lezada nia kanuruk, tuku dala ida iha tilun hun, tuku dala ida iha hirus matan, tuku tan dala ida no dudu lezada monu ba rai halo nia liman sikun hetan kanek.

Prokuradór akuza arguidu kontra artigu 145KP kona-ba krime ofensa integridade fizika simples konjuga ho artigu 2, (c) 3 (b), 35 (b) LKVD.

Produsaun ba prova

Iha prosesu julgamentu, arguidu konfessa integralmente.

Enkuantu lezada kontinua konfirma ho akuzasaun sira antes.

Alegasaun Finál

Prokuradór haktuir katak akuzasaun ne'e fó pena tinan ida no suspende ba tinan rua ba iha aktus nebe'e arguido halo.

Enkuantu defeza husu ba tribunal atu fo pena pena multa ba arguidu.

Desizaun

Depois de avalia faktu sira hotu, tribunal prova arguidu komete duni krime hasoru lezada, nune'etribunal konklui prosesu ne'e no kondena arguidu ho pena multa US\$60.00 kada loron sei selu \$1.00 durante loron 60 no bainhira arguidu la kumpri pena refere tribuná sei aplikapena alternativa durante loron 30 prizaun.

11. Krime Burla Agravadu

Nú. Prosesu	: 0167/2020.PDDIL
KompozisaunTribunál	: Koletivu
Juis	: Dr. João Ribeiro, Dra. Maria Solana, Fernades no Dra. Ana Paula
Prokuradór	: Dr. JasintoBabo
Defeza	: Dra. Bety Laurinda Pinto
Desizaun	: Absolve

Iha 27 Abril 2022, Tribunál Distritál Dili prezide julgamentu leitura sentensa ba krime burla agravadu ne'ebé envolve arguidu Sergio de Arauju Amaral hasoru lezada Mira da Costa Mascarinhas, iha Munisípiu Dili.

AkuzasaunProkuradór

Prokuradór akuza katak iha loron ne'ebé la apuradu maibé iha fulan Agostu tinan 2021 iha oras tuku 9:00 dadeer arguidu ba lezada nia uma iha Pantai Kelapa, suku Fatuhada Munisipiu Dili, hodi fó hatene ba lezada kona-ba halo hela projetu instalasaun liña eletridade iha munisipiu Aileu maibé nia iha difikuldade nune'e husu lezada nia kareta ho marka pajero 2800 no xapa matrikula 17.367 TL. Ho intesaun hodi ba faan no osan husi rezultadu faan kareta refere arguido uza ba nesessidade projetuinstalasaun eletridade nian.

Arguidu mós promete katak kuandu nia hetan ona pagamentu ba projetu ne'e, nia sei sosa fali kareta ho marka RUSH hodi troka lezada nia kareta refere, lezada mós aseita no entrega nia kareta refere ba arguidu.

Iha loron 04 Janeiru tinan 2020 arguidu hetan pagamentu ba projetu ne'e no arguido ba iha lezada nia residencia hodi mos osan iha pasta ida nune'e lezada husu arguidu

dehan 'bele selu ona hau nia kareta' maibe arguidu deha 'hein lai hau sei sosa ó nia kareta ne'ebé di'ak liu pajero ne'e'

Maibe depoisde hasoru malu iha 4 Janeiru ne'e, arguidu la mosu ba iha lezada nia uma no bainhira lezada kontaktu liu husi via telemovel ou *What'sup* arguidu la responde.

Arguido nia haholok ne'e fó prejuizu ba lezada ne'ebé lezada lakon nia kareta ho folin US\$.8000.00. Arguido bosok lezada hodi promete katak bainhira projeitu hetan pagamentu arguidusei sosa kareta ho marka RUSH ba lezada maibé nia bosok hela de'it to ohin loron.

Arguido prátika aktu ne'e ho forma livre, deliberada e konsientimente la obta sira nia comportamentu, maske arguidu hatene ho didiak katak depois projetu hetan pagamentu nia tenke entrega osan ba lezadu ho valór osan kareta ne'e nia folin ou sosa fali seluk tuir promessa ne'ebé iha nune'e mós nia hahalok ne'e lei proibe.

Prokuradór akuza arguidu kontra artigu 260 KP kona-ba krime burla agravado. .

Produsaun ba prova sira

Iha prosesu julgamentu, arguidou konfesa hotu faktu sira hotuno promete sei selu fali lezada nia kareta refere ho prestasaun (*cicilan*) maibé atu selu bainhira ne'e maka arguidu la termina tanba arguidu seidak iha osan.

Entertantu lezada konfirma akuzasaun katak arguidu nia deklarasaun ne'e loos hotu.

Testemuña Marcos Santos haktuir katak arguidu husu ajuda ba lezada atu faan lezada nia kareta ho marka pajero 2800 ho xapa matrikula 17.367 TL, ho intesaun atu arguidu uza ba nesessidade projetu nian. Lezada mós aseita hodi faan kareta ne'e no bainhira projeitu hotu arguidu sei sosa fali kareta di'ak liu ba lezada. Testemuña mós deklara katak nia lahatene kona-ba presu hosi kareta ne'ebé arguidu faan. Maibé ikus mai arguidu la consegue sosa kareta foun hanesan nia promete ba lezada no arguidu intrega fali kareta ho marka Prado ba lezada ho kondisaun kareta ladun di'ak, durante kareta iha lezada nia liman sempre aat no lezda mak hasai osan rasik ba hadia kareta refere.

Testemuña mós deklara katak lezada tenta halo kontaktu ba arguidu hodi konfirma kona-ba kareta ne'ebé arguidu promete atu sosa foun no mos informa kona-ba kareta Prado ne'ebé arguidu intrega ba lezada ho kondisaun ne'eebe ladun di'ak. Testemuña mos ha konfirmadireita ho arguidu hodi intrega dokumentu sira kareta Prado nian no ikus arguidu blokea hotu testemuña no lezadu nia número kontaktu.

Alegasaun finál

Prokuradór haktuir katak faktu sira iha akuzasau ne'e loos hotu no agruidu konfesa no prátika krime burla agravado ne'ebé previstu iha Artigu 260 KP. Konsidera mós ba boa fé no ma fé husi prosessu arguidu entrega kareta Prado ba lezada hodi fasilita lezada no lezada óuza kareta prado. Maibé kareta refere aat lezada mak hadia fali kareta ne'e

ho gastus US\$500 no arguido faan tiha lezada nia kareta marka pajero 2800 ho xapa matrikula 17.367 TL Alende ne'e konsidera ba boa fé tanba arguidu fasilita lezada hodi uza kareta Prado ne'e no kareta refere para iha lezada nia uma durante tinan rua ona. Prokurador husu indeminizasaun sivil (danu patrimoniál) ba responsabilidade arguidu nian.

Entretantu defeza haree ba avalisaun arguidu apresenta kontestasaun no konfirma fila fali kareta entrega fali kareta seluk ba lezada no alegasaun prokurador kata arguido labosok tanba arguidu entre fila fali kareta parado ne'e ba lezada no lezada uza. no haree ba elementu arguidu boa fé no prátika krime burla tanba arguidu la ho intesaun bosok ba lezada no arguidu promete sei sosa kareta lezada nian di'ak liu pajero ne'e" nune'e husu ba tribunál absovelarguidu.

Desizaun

Depois de avalia fakstu sira hotu tribunál prova katak faktu balun loos no balun laloos nune'e tanba arguidu la prátika krime burla agravadu no la priense rekezitu burla agravadu no tribunáls husu ba lezada atu apresenta kontestasaun durante loraun 15 iha kazu sivil ho nune'e tribunál decide absolve arguidu husi prosesu.

12. Ofensa intrigridade fizika simples ho natuzera violénsia doméstika

Nú. Prosesu	: 0243/21.DIBCR
KompozisaunTribunál	: Singulár
Juis	: Dra. Maria Solana Fernandes
Prokuradór	: Dr. Napolão Soares da Silva
Defeza	: Dra. Joana Cristina Pintu
Dezisaun	: Pena multa

Iha 28 Abril 2022, Tribunál Distritál Dili preside julgamentu leitura sentensa ba krime violénsia doméstika ne'ebé envolve arguida DM hasoru lezadu AR iha aldeia Has-laran, Suku Camea, Postu Administrativu Cristo-rei, Munisípiu Dili.

Akuzasaun

Prokurador akuza katak iha 23 Outubru 2021 iha oras tuku 22.00 kalan iha uma aldeia Has-laran, suku Camea, Cristu-rei, Dili, arguida DM nia primu ba hemu tua iha lezadu nia uma oin no bolu joven sira iha bairo laran ho kolega balun durante semana tolu sempre ba hemu tua iha sira nia uma oin ona no lezadu mós fó hatene ba arguida dehan '*sira labele hemu tua iha ita nia uma oin se karik hemu tua lor-loron iha ita nia uma oin ita nia viziñu sira hare ita la gosta, hau nia feton sira mos la gosta*'. Maibé arguida DM tolok fali lezadu no hakilar iha estrada hodi ba husu tuir lezadu nia feton no subriñu iha lezadu nia feton sira nia uma. Kuandu arguida fila ba uma lezadu toba tiha ona iha kuartu laran nune'e arguida tolok lezadu ho liafuan mal, arguida tolok lezadu dehan *ó ba sae fali ó nia feton no ó nia feton sae fali óamino*, no iha momentu ne'e lezadu grava-halo filme hela ba arguida nia liafuan tolok sira ne'e ho nune'e arguida haksoik ba hadau tiha lezadu nia telemovel no lori nia liman kukun lees lezadu nia liman sorin karuk, hirus matan, tilun, no ain kabun.

Prokuradór akuza arguidu kontra artigu 145 KP konjuga ho artigu 2' 3 (a) no artigu 35 (b) LKVD .

Produsaun ba prova sira

Iha prosesu julgamentu, arguida hili direitu nonok.

Entertantu lezadu nafatin konfirma ba faktu sira iha akuzasaun.

Alegasaun finál

Prokuradór konsidera faktu sira iha akuzasaun ne'e loos, lezadu konfirma, tanba ne'e husu ba tribunál atu kondena arguida ho pena prizaun fulan tolu no suspende ba tinan ida fulan neen.

Enkuantu defeza iha nia alegasaun haktuir katak krime ne'ebé arguida halo ne'e kmaan, arguida arrepende ba nia hahalok no sira diak malu ona tan ba ne'e defeza husu ba tribunál atu aplika pena multa.

Desizaun

Depois de avalia faktu sira hotu tribunál kondena arguida ho pena multa ho osan US\$60.00 kada loron selu US\$1.00 durante loron 60.

13. Krime ofensa intrigridade fizika simples ho natuzera violénsia doméstika

Nú. Prosesu : 0241/21.DIBCR
KompozisaunTribunál : Singular
Juis : Dra Ana Paula
Prokuradór : Dr.Napoleão Soares da Silva
Defeza : Dr.Estaqui Guterres
Dezisaun : Absolve

Iha 5 Maiu 2022, Tribunál Distritál Dili prezide julgamentu leitura sentensa ba krime ofensa intrigridade fizika simples envolve arguidu ARdG hasoru lezada DM iha aldeia Has-laran, Suku Camea, Postu Administrativu Cristo-rei, iha Munisípiu Dili.

Akuzasaun

Prokurador akuza katak iha 23 fOutubru 2021 iha oras tuku 22.00 iha uma aldeia Has-laran, suku Camea, Cristo-rei, Dili, arguidu ho kondisaun lanu todan, tolok lezada no arguido tuku dala ida, iha lezada DM nia kotuk laran no tuku dala ida lezada nia knosen sorin karuk no kaer lezada nia fuk hodi rasta ba rai.

Arguidu ninia halo ne'e halo lezada senti moras iha kotuk laran, knosen parte karuk ho ulun no lezada ba halo tratamentu iha Pradet.

Prokuradór akuza arguidu kontra artigu 145 KP kona-ba krime ofensa integridade fizika simples konjuga ho artigu 2, 3 (a) no artigu 35 (b) LKVD.

Produsaun ba provas sira

Arguidu deklara katak akuzasaun ne'e la loos tanba nia ko'alia kona-ba disiplinina iha uma laran no atu fó hanoin deit, arguidu fila husi serbisu hodi fó xamada atensaun ba lezada nia primu sira katak kaundu atu hemu tua mai hemu iha uma laran la'os hemu fali iha uma oin tanba ema viziñu sira la gosta nune'e arguidu ba tiha nia feton nia uma. Bainhira arguidu fila husi nia feton nia uma iha oras tuku 21:00 kalan, arguidu mós deklara katak nia la baku lezada maibé nia liman kona kois deit iha lezada nia kotuk laran.

Entertantu lezada nafatin konfirma ba faktu sira iha akuzasaun no lezada husu ba tribunál hodi desiste tiha kazu ne'e.

Alegasaun finál

Prokuradór haktuir katak faktu sira iha akuzasaun ne'e loos hotu, tuir konfirmaun husi lezada nian, tanba ne'e husu ba tribunál atu kondena arguidu ho pena prizaun fulan tolu suspende ba tinan ida fulan neen.

Enkuantu defeza konsidera katak arguidu hanesan xefe família iha obligasaun atu fó hanoin ba lezada no membru família sira seluk, arguidu mós arrepende ninia hahalok, di'ak malu ona, moris hamutuk hanesan feen-la'en nune'e husu ba tribunál atu halo desizaun ida ne'ebé refleta ho prokuradór ninia akuzasaun no aplika pena ne'ebé kmaan ba arguidu.

Desizaun

Depois avalia faktu sira hotu, Tribunál la prova faktu kona-ba rasta no tuku no haree mós ba faktu balun la apar ho akuzasaun konsidera mós ba lezada nia deklarasaun nune'e tribunál deside hodi absolve arguidu.

Atu hetan informasaun liutan bele kontaktu:

Ana Paula Marçal
Diretora Ezekutiva JSMP
Email: ana@jsmp.tl
Telefone: 77040735
Website: <https://jsmp.tl/>